



Centralna banka  
BOSNE I HERCEGOVINE  
Централна банка  
БОСНЕ И ХЕРЦЕГОВИНЕ



# Informacija o rezultatima ankete o inflacijskim očekivanjima iz marta 2026. godine

---



Percepcije o budućem rastu cijena predstavljaju važan element u ekonomskom odlučivanju, jer utiču na ponašanje domaćinstava i finansijskih institucija u pogledu potrošnje, štednje i investicija. Zbog toga su očekivanja inflacije značajan indikator za praćenje ukupnih ekonomskih kretanja i donošenje mjera ekonomske politike. Centralna banka Bosne i Hercegovine provodi redovno anketiranje kojim prikuplja stavove o budućem kretanju cijena. Ovo anketiranje je usmjereno prvenstveno na učesnike finansijskog sektora, pri čemu kontinuirano učešće banaka i osiguravajućih društava omogućava prikupljanje pouzdanih i relevantnih procjena. Rezultati anketiranja omogućavaju širem krugu korisnika uvid u očekivanja finansijskog sektora, čime se dodatno jača transparentnost i dostupnost ekonomskih informacija.

Martovski krug ankete ukazuje na blago povećanje očekivane inflacije za 2026. godinu, pri čemu projekcija iznosi 3,40%, što je za 0,20 procentnih poena više u odnosu na decembarSKI krug. Istovremeno, za 2027. godinu očekuje se postepena stabilizacija inflacije, uz projekciju od 2,70%. Pad inflacijskih očekivanja u tom periodu ukazuje na pretpostavku da će se eksterni pritisci postepeno ublažiti, te da će doći do stabilizacije ekonomskog okruženja i smirivanja inflacijskih kretanja.

Inflacijska kretanja u savremenim ekonomijama rezultat su složenog međudjelovanja globalnih i domaćih faktora, pri čemu su posljednjih godina posebno izraženi uticaji poremećaja u lancima snabdijevanja, rasta cijena energenata i geopolitičkih tenzija, uključujući i eskalaciju oružanih sukoba između SAD-a i Irana. Ovi faktori su doveli do značajnog rasta cijena na globalnom nivou, što se odrazilo i na manje otvorene ekonomije. U Bosni i Hercegovini inflacijski pritisci su u velikoj mjeri bili uvezeni, imajući u vidu visoku zavisnost od kretanja cijena na međunarodnim tržištima, posebno u segmentima hrane i energije. Istovremeno, domaći faktori, poput potrošnje i strukture tržišta, dodatno su oblikovali dinamiku rasta cijena. U takvom okruženju, praćenje inflacijskih očekivanja i kretanja cijena dobija poseban značaj, jer omogućava pravovremeno razumijevanje trendova i potencijalnih rizika. Stabilizacija inflacije u narednom periodu uveliko će zavisiti od smirivanja globalnih neizvjesnosti, kretanja cijena ključnih sirovina, kao i ukupnih ekonomskih politika na međunarodnom i domaćem nivou.

